


Muy pronto na Tele Aruba...

DEN AMBIENTE

BUSCANDO TALENTO ARTISTICO CU "EVITA PROMOTIONS"...



** E aña aki Aruba lo bay conoce un programa farandulero nobo riba pantalla di Tele Aruba cu ta hiba e nomber "BUSCANDO TALENTO ARTISTICO".

E organizacion tras di e proyecto aki ta "EVITA PROMOTIONS", kende lo bay organiza evenementonan cu artista y orquestanan local y tambe esnan internacional.

E prome evenemento di e organizacion aki ta pa "SALI"

en busca di nos talentonan local scondi. Esaki ta pa duna e candidatonan aki cu talvez nunca a haya e chens di demonstra nan talento e oportunidad pa hasi tal.

E programa aki lo bay cubri netamente canto cu e posibilidad pa den futuro agrega otro topiconan artistico.

Durante un entrevista cu Efraim Antonio di "Evita Promotion", kende porcierto ta e motor tras di e valioso proyecto aki, Efraim Antonio a declara cu "Buscando Talento Artistico" ta mas bien pa recorda e añanan '50. Nostalugia y e bunita recuerdo di e temponan ey a provoca nos pa rebiba e programa aki cu Adison Croes tabatin tur diadomingo merdia via e radio emisora "Voz di Aruba", Antonio ta afirma.

E tan fama "Buscando Talento Artistico", den cual programa ta asina leeuw cu Efraim ta corda, tabatin dos presentacion, cantando cancionnan manera "El Negrito del Batey" y "Todo me gusta de ti" di e

inolvidable cantante Alberto Beltran.

Efraim ta kere cu ta na su lugar pa duna elogio tambe na e pianista cu tabata acompaña tur e jovennan, kende tabata mihor conocir como "El Maestro", Emelindo Leonor (q.e.p.d.).

Asina pues Antonio Efraim hunto cu algun di su coleganan cu ta gusta canto a yega na e idea pa rebiba "Buscando Talento Artistico", pero e biaha aki via Tele Aruba, pa asina trece e programa aki den hogar di nos televidentenan y di e forma aki duna un aporte na nos artistanan "Scondi", cu ohala

pa motibo di nos programa un dia nan lo wordo descubri.

Antonio ta sigui amplia cu e programa lo bay ser realiza un biaha pa luna riba diasabra den un forma "Live show" den ballroom di Holiday Inn Hotel. Entrada lo ta completamente gratis.

E prome show lo ta dia 23 di Maart 1996.

For di awor caba "Evita Promotion" kier a hasi un suplica na e comunidad Arubano pa bay presencia e shownan aki pa asina stimula nos artistanan di mayan.

Cada luna lo escohe un ganador. Tur e ganadornan di cada luna lo topa cu otro den

e encuentro final pa 1996, na fin di November e ganador absoluto pa 1996 lo wordo saca.

E evenemento aki lo termina cu presentacion di e ganadornan di cada luna, artistanan invita y cu un grandioso fiesta bailable despues.

Antonio ta declara cu e exigencianan ta cu tur esnan intersa mester tin 17 aña bay ariba y mester ta local (esta bibando na Aruba) y no ta artista profesional.

Bo por participa yamando awe mes na tel:21220 despues di 6or di atardi y puntra pa Efraim Antonio..

Dia 2 di Maart nan lo ta na Aruba...

E TRIUNFADORNAN INDISCUTIBLE DI MERENGUE LOS TOROS BAND...

Awe merdia for di Cheers Cafe Bistro...

HOPI INTERES PA "ANALISIS ARUBA SU CARNAVAL 42" VIA RADIO GALACTICA...

** Interesan ta grandi pa e topico "Analisis Aruba su Carnaval 42", cual lo ser teni awe merdia entre 12or pa 2or den Cheers Cafe Bistro.

E programa aki lo ser transmiti envivo pa Radio Galactica Fm 99.9 durante e programa di DEN AMBIENTE "Show di Poets".

Tur cos ta cla caba na unda un panel consisti di personahenan clave di nos Carnaval lo ta presente.

Durante e programa lo analisa y evalua nos recien Carnaval, cu e meta primordial pa trata di resolve y rescata nos fiesta di pueblo considerando e pilar di nos cultura.

Naturalmente henter pueblo di Aruba tambe tin e oportunidad pa yama via e dos liñanan di Radio Galactica: 30999 of 39099 y expresa nan opinionnan na bienestar di nos Carnaval.

Corda bon pueblo! "Solo el PUEBLO salva su FIESTA del PUEBLO", pues percura pa bo ta claba na Radio Galactica y manda bo sugerencia, pasobra BO OPINION TAMBE TIN VALOR...



** Otro siman diasabra dia 2 di Maart e colonia Dominicana lo ta di fiesta enconexon cu celebracion di "DIA DEL LA INDEPENDENCIA DEL LA REPUBLICA DONIMICANA".

Pa e ocasion aki lo ta na Aruba e triunfadornan indiscutible di e sabroso musica di merengue, LOS TOROS BAND.

E formidable agrupacion musical aki lo presenta den Club di DOSVA mano a mano cu E.Q.O. No tin duda cu e celebracion aki lo bay resulta den un exito rotundo.

Pa otro siman DEN AMBIENTE lo publica e biografia exitoso di e tremendo orquesta Dominicano aki cu lo baha manera un TORO BRABO...